

Fut kale Fol em Auk Teben Fut Timoti elo Dabalalewse Fut kale.

1 ¹⁻²Timoti, belew yako! Ku Kulais Yesus elo “Fein!”, dangbelew angomi, nem min atew kelew, ne kulo ibolow fian dukembi te.

Sunbin-Got e akalem ibolow fukunin geleweko, nelo Kulais Yesus em kalan kunum kenemei, ne uneko, mali kawtiw ilo Kulais Yesus em sunsun finik so bin ilo duyembin em weng bakayem tem bakayem tem unakabi te.

Nakanum a! Nukalem Aatim Sunbin-Got so, nukalem Kamok Fian Kulais Yesus so, yelim i kulo ikalem ibolow folok e, kinkin e, menew e, fein kekemboliwka!^a

Kalaing Kelewse em Weng te.

³Kutiliw banim, taw banim, nem Sunbin-Got eso weng bakabi ding dim bakate, ne diwkuw kom ibolow fukuneko, Sunbin-Got elo “Weso! Seyo!”, dangakabi te. Nem awalik kumel im Sunbin-Got em em wiin daolew kemaliw kukuw imdiw nakati sen so banim keko, Sunbin-Got so ibolow ki makmak kebomi, em wiin daolew kemin kukuw gelew kabi te.^b

⁴Nakanum a! Nem kulo kokemsi ding kabalak e, ku amemin fian mak kelew kasike, ne diwkuw kom ibolow fukuneko, “Iti katebamomin ibolow fian kebi te!”, angbi te. Feinka! Kulo iti katemoki em ding dim e, ne kalfong fian mak kuluko, katemoki te.

⁵Sua e, ne kawkok Alois so, kauk Yunis so, yat im atin kuw fein ibolow beelo atemsi te. Atemsomi, kame akal kal kelite: Kom fein ibolow e im fein ibolow bakate tew kele angomi, ku Sunbin-Got elo atin kuw “Fein kae!”, dangbelew kunum kute te.^c ⁶“Fein!”, dangbelew kunum kebelew kasike

^a 1:1-2 Kalan Kunum 16:11; 1 Timoti 1:2 ^b 1:3 Kalan Kunum 23:1 ^c 1:5 Kalan Kunum 16:1

kame, ku nem teing kom dim dukusi ding dim beelo ibolow fukuna! Beem ding kabalak e, Sunbin-Got e akalem Sunbin-Finik elo dukemei, ku akalem bamki fian kuluselew te. Kuluselew kasike kame, bamki beem mamin e iti fian kekeme kano, ku beem aluwbamin e kitil kuw aluwbabuma!^d ⁷Ku kilele ibolow fukuna! Sunbin-Got e nulo finganin ibolow mak duyeminba kese kate, Sunbin-Finik e num ibolow elo kitil keyembomi, ibolow fian dulew dulew kemin kukuw keyemeko, num ibolow tou keyemse te.^e

⁸Kasike, ku kanelom finganeko, mali kawtiw ilo nukalem Kamok Fian em sang bakayembomin e finganemokolew te! Ku kilila! Ne Kulais em weng afak kunum keko, aluwbabili, maka i nelo sok am tem da konemsiliw kasike kame, ku kanelom nem kanenemsiliw beem dulum elote inkal kulamokolew te! Babo! Kate, ku Sunbin-Got em dukemse kitil beso kaso nu makuw fangfang dako, Sunbin-Got em Weng Kal Ken Ati kaleem bakayembin beem betbet ilum daoko, kakamoluwka!

⁹Sunbin-Got e nulo akalem wiin so amkoko, “Yu nakalem galmosi kunum waneng keko, boliwka!”, yangeko, num kuankemin deiw bul gewsi belei, okilewoko, akalem mit finik so deiw mo koyemse te. E nulo “Yu ken kukuw kebiliw yake!”, beni “Wa kukuw kebiliw yake!”, yangeko, diw yeteminba kese kate, akalem ibolow fukunin so, akalem ibolow folok so, bete kuw gelewko, kaneyemse te. Feinka! Sua sua kel, kawin kale talfut kelinba kese ding akate, e num ibolow fukuneko, “Ne Yesus biim dulum elo dabalaloki te!”, angse te.^f ¹⁰Keko beli, kame e, Sunbin-Got em ibolow folok kukuyemse be, nukalem Kulais Yesus em dim kel fein kaim dim keko, fitewse te. Nimtew angom? Esik num kuankemin deiw bul gewsi belei, okilewoko, kuanomin em kitil elo de mit dako, banim kelewsomi, nulo Sunbin-Got em mit finik so deiw mo koyemse kasike. Fein te! Kanelewse beem Weng Kal Ken Ati be ailbin atew keko, diwkuw finik so bin em deiw kukuyemkabe te.^g

¹¹Beli, Sunbin-Got e nelo akalem wiin so amkoko, aluwbamin alemsal mak dunemse te. Aluwbamin be kanekote:

Mak e, em weng bokose weng bakamin e,
mak e, kalan kunum kemin e,
mak e, mali kunum waneng ilo kukuyemin ete te.^h

¹²Kaneko kasike, aluwbamin beem mongom ete kame ne sok am kale bomi, betbet kal ilum mak kulabi te. Kate, ne Sunbin-Got em weng bakamin beem aluwbamin e inkal kelinba kekabi te. Babo! Nimtew angom? Ne “Fein kai!”, dangbi kunum beelo kilele kal kebomi, kilele dolon kelite: E kitil auk so keko, nelo dunemkabe aluwbamin beem dem beelo kilele atemkabe kasike kame uneko, Yesus em diwoko, geeyemboke ding toloke ding unei, kanebi dem be diwkuw ken kuw boke te.

^d 1:6 1 Timoti 4:14 ^e 1:7 Ulom 8:15 ^f 1:9 Efesus 2:8-9; Taitus 3:5 ^g 1:10 Kibulu 2:14

^h 1:11 1 Timoti 2:7

¹³Timoti kutaka! Ku nemisik kamtoloko, kiol kuw weng kalekemi be kitil kuw aluwko, mali kunum waneng ilo akal kilele kukuyemolewka! Kukuyemomelewi, ku Kulais Yesus em “Fein kai!”, angeko, ibolow dulew dulew kukuw beemdiw keko, kakamolewka! ¹⁴Nim tew angom? Sunbin-Got e kulo aluw bamin ken be dukemse kasike, ku aluw bamin be nukalem dim alakabe Sunbin-Finik em dakakemin kitil so kilele kelewbolewka!ⁱ

¹⁵Ku fein kiliko, kal kelomete: Kulais elo “Fein kai!”, dangakabiliw kunum waneng Esia aneng fian kolewsomi, kale talsiliw kawtiw alik alik i nelo konemsiliw te. Konemiwi, Figelis so, Elmogenes so, aso ikati nelo konemsiliw te.

¹⁶Ne Sunbin-Got elo diwkuw weng mak bokolewomeli: “Kute keko, Onesifolus em aul waneng ilo ibolow folok kukuyemoka!”, dangbi te. Nim tew angom? E inkal kelinba keko, iti tele tele keko, nelo sok am tem kel netemei, nem ibolow so foo angsi kasike. ¹⁷Em Ulom abiw mutuk fian kalo talse ding dim bakate, e kitil keko, nelo fenbismi, nelo fein netemse te. ¹⁸Fein, kukati kilele kal kelomelew: Sua kel, nem Efesus abiw mutuk fian bisi ding dim bakate, e aluw bamin banban aluwko, nelo akati dokonemse te.

Fefe ding kabalak e, Sunbin-Got e elo kinkin ibolow fian mak kelewoka!

Yesus elo Kilele Gelewomin em Weng te.

2 ¹Nem min emdiw kebelew nakunum Timoti kutaka! Kulais Yesus em ibolow folok e kulo kitil kuw kekembomaka! ²Ne kawtiw kunum waneng im kiin dim kel kukuyemin banban kaleyembilii, kukati wosuselew kasike kame, mali kawtiw ibolow fukunin kilinin ken so kunum waneng ilo weng bakabi weng be kukuyembolewka! Kukuyembelewi, ikati kilele wosuko, mali kawtiw ilo iti kaleyemkamoliw te!

³Ku nem fakam weng kale kilila! Ku Kulais Yesus em fein ken wonuk so kunum emdiw keko, em weng afak kebomi, akalem aluw bamin ete kuw kemolewka! Kebomelewi, ku aluw bamin beem betbet ilum akati kuluko, mali Sunbin-Got em Weng Ken Ati be dekakabuluw kunum numdiw kesomi, fangfang dako, betbet ilum daoko, de kakamolewka!^j

⁴Nimin kawtiw ite wonuk so kunum keliw tewe, i kanelom ikalem aluw bamin so, kut em aluw bamin so, bonggumokoliw te! Babo! Kate, i kitil keko, ikalem yetebe kak kunum em kiin dim e “Kiol kuw aluw bamin ken ati keluma!”, angakabiliw te. ⁵Beemdiw, mesik esik mali kawtiw mak wonuk kuluko, kikin bonge bonge kesomi, kikin beem sawa weng fein gelewiw tewe, i yan be nam kuliw te.^k ⁶Beemdiw, kunum mak kitil keko, wanin kaimin kunum kesomi, wanin kailiw tewe, i imisik

ⁱ 1:14 1 Timoti 6:20 ^j 2:3 2 Timoti 1:8 ^k 2:5 2 Timoti 4:8

keko, fein wanin dem be kulokoliw te.^l ⁷Ku nem weng be kilele fukuna! Fukunew tewe, Kamok Fian e kom ibolow fukunin e alik beem dulum elote kilele dolon kuw kekemoke te.

⁸Ku iti Yesus Kulais em sang kilele ibolow fukunolewka! E fein kun so kal so kunum keko, emisik kamok Debit em fein mulkis kebomi, kuaneko, iti dawkalfolse te. Sunbin-Got em Weng Kal Ken Ati kanese sang bete ne aneng aneng angom de kakabi bakate.^m ⁹Nem Sunbin-Got em Weng Kal Ken Ati kale bakamkakawkabi beem mongom ete ne mali im kiin dim e sakalaw mamtel kunum emdiw kesomi, nem betbet ilum kulabi ding kabalak e, i nelo “Sok am tem da konemuma!”, nangakabiliw te. Nangakabiliw kate, i Sunbin-Got em Weng Kal Ken Ati be sok so nam net keliw te.ⁿ ¹⁰Kasike, nomin eisneng mak nem dim tele tewe, “Kulais Yesus e Sunbin-Got em akalem wiin so amkoko, koyembe kunum waneng im kuankemin deiw bul gewsi goto kele kasike, ikal finik so sunsun bin kuluko, eso akalem auk so kitil so kamok kebe dim kel bokoliw te!”, angeko, ibolow fukunbomi, ilum be daoko, fein aluwkabi te. ¹¹Weng bokokabiliw weng kale fein weng te! Ku kilila!

Nimin kunum waneng ite eso kuansiliw tewe, i eso iti teineko, finik so bokoliw te.^o

¹² Nu kitil keko, betbet ilum beem dulum elote beit kelinba keko, fein ibolow so kekakabuluw tewe, nukal eso makuw kamok kebokoluw te.

Kate nu elo ibiku kuluw tewe, e nulo akati ibiku koyemoke te.^p

¹³ Nu elo “Fein kai!”, dangbuluw kate, nu nukalem weng be fein gelewinba keluw tewe, e numdiw kelinba kesomi, akalem weng ete fein gelewoke te!

Nim tew angom? E akalem “Nam koyemi te!”, angse weng be nam alwol kelewbe kasike.^q

Timoti elo Kewkew Weng Bokolewse em Weng te.

¹⁴Ku diwkuw kunum waneng kaliilo nem bokokemsi weng be “Yu kililina!”, yangomi, kitil keyembolewka! Keyemsomi, Sunbin-Got em kiin dim e kitil weng mak bokoyemomelew: “Yu kanelom fong eisneng beem dim kel weng ane ane kebomi, ganbin weng kuw kemokoliw te!”, yangboléwka! Nim tew angom? Mesik esik mali im ibolow dokoyeminba keko, ganbin weng be, kilikabiliw kunum waneng im fein ibolow be wa keyembomi, de mit da koyem kemoke kasike.^r ¹⁵Ku kitil keko, Sunbin-Got em kiin dim kel em fein weng afak kunum kebolewka! Kebew tewe, ku

^l 2:6 1 Kolin 9:7 ^m 2:8 Ulom 1:3; 1 Kolin 15:4 ⁿ 2:9 Efesus 3:1,13; Filibai 1:12-14

^o 2:11 2 Kolin 4:11 ^p 2:12 Matyu 10:33 ^q 2:13 Ulom 3:3-4; Taitus 1:2

^r 2:14 1 Timoti 6:4; Taitus 3:9

mali kunum waneng ilo Sunbin-Got em fein weng kilele kukuyembomi, sen so banim kunum keko, bokolew te.^s ¹⁶Bomelewi, ku mali kunum waneng im sakok weng wa so, sosen weng so, bokolew bokolew kebeliw weng beem mit mewso unemokolew te! Nimte w angom? Weng wa bokolew bokolew kebeliw weng be kawtiw im ibolow e teifuluyemei, i Sunbin-Got em deiw be atin kuw kolewko, bakilewsiliw kasike.^t ¹⁷Feinka! Weng an salew salew be abung fian bilit emdiw kekabe bakate. Ku Kimeneus so, Filetus so, aso im kanekabiliw kukuw beem dem atemeko, diwyema!^u ¹⁸Aso i fein weng em deiw be kolewoko, dasuw weng kuw kukuyemomeliw: “Kuansiliw kawtiw i sua kel yemkalfoleko, baba teinsiliw kasike, i iti kuaniw tewe, i nam baba teiniw te.”, angenaliw te. Angbomi, mali kunum waneng im fein ibolow e, bangbang koyem kemaliw te.

¹⁹Kate, Sunbin-Got e ilkul kitil nam emdiw mak kuluko, moko, beem dim e weng alew mak bose te. Weng mak e kanekote: “Kamok Fian e akalem kunum waneng ilo kilele kal kebe te!” Nanew weng mak e kanekote: “Nimin kawtiw ite bokolomeliw: ‘Nu Kamok Fian so amkoko, bonggusuluw te!’, angiw tewe, i mamtel kukuw ibiku koyem kemoliwka!”^v

²⁰Ku nem fakam weng kale kilele kilila! Am fian sel mak beem kawtem e ok sen banban mak bete. Mali ok sen be on kisol so keko, ^gol so, ^silba so, kaisomi, wiin so aluwbamin beem dulum kaisiliw kate, mali ok sen mak e i sak ais so, kawin so kaisomi, sak aluwbamin beem dulum kaisiliw te. ²¹Beemdiw, ninim kunum waneng ite mak ikalem dim beem wa kukuw kolewiw tewe, i on kisol so ok sen emdiw kesomi, im kamok im dulum elote momow so kebeliwi, e ilo amen kuw keko, wiin so aluwbamin beem dulum duyemoke te.

²²Ku kunum tanbebel im ibolow danong angeko, sili sili kakabiliw deiw be fon unemolewka! Keko beli, ku mali kunum waneng Sunbin-Got em kiin dim e ibolow kiol so kawtiw iso bongguko, Sunbin-Got elo “Dokoyema!”, dangboliwka! Dangesomeliwi, ku kiol kukuw kemin e, fein ibolow kemin e, ibolow mutuk fian dulew dulew kemin e, ibolow menew kemin e, kukuw beem deiw ete kuw kakamolewka!^w

²³Timoti kutaka! Ku kanelom mali kawtiw iso mongom banim so ganbin weng bokolew bokolew kebokolew te! Kemew tewe, ganbin ilum mak de tolokolew kasike.^x

²⁴Ku kilele ibolow fukuna! Kamok Fian em weng afak kekabiliw kunum i kanelom geelew geelew so, ganin weng so, kemokoliw te! Babo! I ibolow menew kukuw bete kuw kukulew kukulew kemoliwka!

^s 2:15 1 Timoti 4:6 ^t 2:16 1 Timoti 4:7 ^u 2:17 1 Timoti 1:20 ^v 2:19 Aisaya 52:11; Sion 10:14; 1 Kolin 8:3 ^w 2:22 1 Timoti 6:11 ^x 2:23 1 Timoti 4:7

Mali kawtiw i ilo wa kukuw keyemiw tewe, i ibolow tem tem kesomi, ki keko, mali ilo ken kukuw kuw kaleyem kemoliwka! ²⁵ Mali kawtiw mak biim aluwbamin ken beem deiw “Goto kelewuma ol”, angiw tewe, i menew ibolow so kukuw kuw keyemeko, kilele kukuyem kemoliwka! Kemiw tewe, Sunbin-Got e biim ibolow fukunin elo famdes keyemei, i fein weng beelo “Fein kai!”, dangbokoliw tako. ²⁶ “Fein kai!”, dangbiw tewe, i ibolow dolon keko, Seten-Ataanim em abil tem be kolewokoliw te. Nimtew angom? E ilo em abil tem da koyemei, “Nem ibolow fukunin kuw gelewina!”, yangakabe kasike.

Fefe Ding em Kaneloke Sang te.

3 ¹ Timoti ku kilele kal kelolewka! Fefe ding mewso keloke ding kabalak e, ilum fian ding keloke te.^y ² Nimtew angom? Kaneloke kukuw kale i fein diwkuw gelewokoliw kasike:

I ikalem ibolow kuw fukunsomi,
 tum win on kisol kulamin bete kuw ibolow fian kebomi,
 ikalem wiin kuw daosomi,
 ikalem sul kuw kebomi, mali kawtiw im wiin de mit da koyembomi,
 auk so alew so im weng sakalaw keko, weng bo bo kebomi,
 kulomin ibolow kuw kemokoliw kate, alwol keko, kalfong yemomin
 ibolow keyeminba kebomi,
 Sunbin-Got em ayem eisneng beelo “Kanemoka!”, angeko, sakok
 kemokoliw te.

³ Kebomi, ikalem kaim atuk ilo ibolow duyeminba kebomi,
 mali iso iti ken bin abin em kulomin deiw e feninba kebomi,
 mali ilo weng miyemin weng bakayembomi,
 ikalem kal wangweng kelomin ibolow banim kebomi,
 silikmoyembomi,
 ken kukuw elo ibolow kaim alele kolewbokoliw te.

⁴ Kelewbomi, ikalem akunum kumel ilo kiol kukuw keyeminba keko,
 fimdi famde kukuw kuw kukuyembomi,
 fongate kuw sali sali unbe ki kuw kebomi,
 ikalem fukunin e “Nu kunum falim atew kawtiw nute te!”, angeko,
 ikalem wiin dawsulemin kawtiw kebomi,
 kawin kaleem kulomin kalfong ete kuw ibolow fukunbomi, Sunbin-
 Got elo ibolow fian dulewinba kelokoliw te.

⁵ Kebomeliwi, i kal dim ete kuw “Nu Sunbin-Got em angin keluwka!”,
 angbokoliw kate, im mutuk tem kel e, i Sunbin-Got em kiin dim e
 kiol keyemoke beem kital e “Fein kai!”, danginba kelokoliw te.

Ku kanelom kanekabiliw kawiw biim mit mewso unemokolew te!^z

^y 3:1 1 Timoti 4:1 ^z 3:5 Matyu 7:15,21; Taitus 1:16

⁶Mali kanekabiliw kawtiw bi kukuyemin kunum keko, mali ibolow kau angbiliw, baluw waneng im am unesomi, ilo kak keyembomi, biim ibolow fukunin e sok emdiw bingeko, ikalem mit yemde unakabiliw te. Kate sili sili ibolow kukuw so, ibolow danong kukuw so, kukuw beem mongom ete waneng bi ilum kuluko, ibolow tiaktiak kebiliwi, ⁷im ibolow fian e “Nulo kukuyemina! Kukuyemina!”, angbiliw kate, i ki keko, kukuyembin fein beelo nam dolon keliw te. ⁸Kukuyembiliw kunum bi Sanes so, Sambeles so^a, aso im Moses elo maka kelewsiliw emdiw keko, kukuyembin fein beelo maka kelewbiliw te. Ikalem ibolow fukunin e kilonsomi, kal dim e ken kiol kuw kebiliw kate, im fein ibolow em dem e deben nam emdiw te.^b ⁹Kebiliw kasike, sukum ding kuw bomeliwi, im dim deben be kawtol fitew kelei, Sanes so Sambeles so, aso im kanesiliw beemdiw, kawtiw alik alik i biim ibolow kau angbiliw be kilele atemeko, kal keko, dolon kelokoliw te.

Fol em Timoti elo Ibolow Yak Salewse em Weng te.

¹⁰Nakunum Timoti kutaka! Nem kukuyemkemin kukuw e kukuyemkabiliw kunum biimdiw bate. Ku nelo dolon keko, kilele kal kenemselew te. Nem kukuyemin e, nem gelewkabi kukuw e, nem “Nono keko, deiw ete keloke yake!”, angeko, fukunbi e, nem fein ibolow e, nem ibolow nanbow bin e, nem ibolow fian dulew dulew kemin e, nem ilum toloke ding kabalak e, kinkindako, bin e, alik alik angom be ku kilele kal kebelew te. ¹¹Beemdiw, ku abiw mutuk fian alemsal Antiok so, Aikoniam so, Ilistala so, biim kasel im nelo nenomin keko, betbet sakik fian dunemsiliw bakati kilele dolon kebelew te. Kate Kamok Fian e nelo dokonemei, ilum beem deiw e bul gewsi goto kenemse te.^c ¹²Feinka! Nimin kunum waneng ite mak Kulais Yesus eso fewtokoko, “Nu em kiol kuw kunum waneng keluwka!”, angiw tewe, yenomin ilum sakik mak im dim fein telemoke te.^d ¹³Kate wa kawtiw so, fimdi famde kunum so, biim kanebiliw ibolow fukunin be “Ken kai!”, angakabe kate, Seten-Ataanim e im ibolow atin kuw kou keyemeko, dolo keyemkabe kasike, im ibolow fukunin e atin kuw teifulusomelei, i mali im kukuyemkabiliw weng kilikabiliw kawtiw bikati ibolow teifulu koyemkabiliw te.

¹⁴Kakabiliw kate, kukalem kulo kalekemsiliw kunum waneng ilo kilele kal kebelew kasike, ku kal kelewete: Im kulo kukukemsiliw weng be “Fein weng te!”, angbomi, kitil keko, im kukukemsiliw be kilele aluwko, gelewbolewka! ¹⁵Ku aul falkamin ke alenalew ding bakate, Sunbin-

^a 3:8 Suda kawtiw im fasel sang kabalak e, Sanes so Sambeles so aso i Isiw aneng fian em emisik kamok em oktakang kunum alew ke alenaliw kale. Aneng Kolew 7:8-9:12

^b 3:8 Aneng Kolew 7:11 ^c 3:11 Kalan Kunum 13:14-52; 14:5,8-20 ^d 3:12 Matyu 16:24; Sion 15:20; Kalan Kunum 14:22

Got em kukuyemin ayam be kilele kilikemalew te. Keko beli, weng be kom ibolow fukunin e kilinin kekemei, ku Kulais Yesus elo “Fein kai!”, dangenalew kasike, Sunbin-Got e kom kuanomin deiw bul gewsi goto kelewko, finik so bin deiw kel mo kokemse te. ¹⁶Feinka! Sunbin-Got e akalem fut ayam em weng alik alik beelo fukfuka dulewse kasike, em weng be aluwbamin so kekabe te. Em aluwbamin e kanekote:

Mak e kukuyem kemin e,
mak e nukalem sili sili ibolow e kaim dim da koyemin e,
mak e ken kukuw so wa kukuw so kiol kuw kalyemin e,
mak e Sunbin-Got em kiin dim e kiol kuw kukuw kakamin
kukuyemin ete te.^e

¹⁷Kaneko kasike, Sunbin-Got em weng kale akalem kunum waneng nulo memen keemelei, nu ki keko, ken ati kukuw kuw alik alik angom be kilele aluwko, gelewemoluwka!

4 ¹Nakunum Timoti kutaka! Kulais Yesus e iti teleko, finik so biliw kawtiw so, kuansiliw kawtiw iso alik alik ilo diw yetemeko, geeyemoke te. Geeyemsomelei, e diwkuw diwkuw emisik kamok fian keloke kasike kame, ne Kulais Yesus beso, Sunbin-Got so, yelim biim kiin dim e weng kitil weng mak kale bokokemite: ²Ku kanelom “Kame ken ding kebe yake? Wa ding kebe yake?”, angbokolew kate, ku kitil keko, Sunbin-Got em weng kale diwkuw diwkuw bakayembolewka! Ibolow menew kukuw so kukuyembomelewi, ku ilo ibolow tem sayemeko, sili sili kukuw kaim dim dayemeko, weng temtem weng kuw bakayembolewka! ³Ku kilila! Mewso ding keloke kabalak e, kawtiw i ilo fein dokoyemoke kukuyemin be kililominba kis ibolow kemokoliw te. I ikalem ibolow danong so, ikalem ibolow fukunin so, bete kuw gelewabiliw kukuyemin kunum banban feneko, yetemsomeliwi, biim kaleyemin bete kuw kilikabiliw te.^f ⁴Kilikabiliw kasike, i fein dem so weng be ibik kuleweko, fufu sang bete kuw abelew keko, kiliko, gelewabiliw te.

⁵Kate Timoti kutaka! Nomin eisneng mak kom dim telebe tewe, ku ibolow kilinin keko, bolewka! Bomelewi, ku kanelom betbet kulomin em dulum finganemokolew te! Kate ku bukesomi, mali kunum waneng ilo Sunbin-Got em Weng Kal Ken Ati be bakayembolewka! Kom aluwbamin alikum kilele atin kuw aluwkakamolewka!

Fol em Fefe Kuanomin em Weng te.

⁶Nakunum kutaka! Sunbin-Got em am yol em kunum ayam i ^siwsiw men mak anko, aik ayam dim duksoni, Sunbin-Got elo dulewsiliw te. Im kanemaliw aluwbamin beem fefe ding dim kabalak e, i ^wain ok kuluko, aik ayam tikin kel buselemaliw te. Beemdiw, nem fefe aluwbabi ding dim

^e 3:16 Ulom 15:4 ^f 4:3 1 Timoti 4:1

kale, mali kawtiw i nem kaim akal buselnemokoliw te.^g 7Buselnemokoliw kate, nem finik so bisi dim e, ne ganbin kitil nam kunum atew keko, beit kelinba kebomi, Sunbin-Got em dunemse aluwbamin be fein atin kuw aluwsomi, banim kelewsi te. Kelewsomeli, nem fein ibolow akati kitil kenemebei, bisi te.^h 8Kame, nem finik so bin beem awet kebe ding kabalak be, nem yan kuloki ding fenbi te. Nimtew angom? Kamok Fian em alik nulo kiol kuw diw yemoke ding dim bakate, ne elo kiol kuw gelewemeli em yan fian kuloki te. Kate nemikel kuw nam kuli te. Babo! Alik alik em toloke ding feneko, “Toloka!”, angbiliw kunum waneng iso neso alik alik nu makuw yan ki makmak kulokoluw te.ⁱ

Timoti e Fol elo Atebam Unoke em Sang te.

⁹Timoti, ku fongate akate deiw fenko, nem fukun tololewka! ¹⁰Neso bise kunum Demas e kawin kaleem eisneng beelo iti ibolow kuw keemeko, nelo konemeko, Tesalonaika abiw mutuk fian elo unese te. Kelesens akati konemeko, Galesia aneng fian elo unese te. Unei, Taitus e Dalmesia aneng kalo unese te.^j

¹¹Iluk ete kuw kale neso be te.

Be kasike, kom tolokolew ding dim bakate, Mak akati debele tololewka! Debele telewi, e nem dakanembin kunum kebomelei, Sunbin-Got em aluwbamin aso nukalem makuw keko, aulbamokoluw te!

¹²Ne Tikikus elo dabalalii, e Efesus abiw mutuk fian elo unese te.

¹³Timoti a! Kom tolokolew ding kabalak e, ku nem asolow ilim be kanelom akokow kelokolew te! Sua e, nem Toloas abiw mutuk fian ka kel bomelii, ne ilim be nakunum Kalbus em am kel kolew telsi te. Ka akate fut mali mak kolewsi kasike, beso de tololewka! Nem ibolow fukunin e atin kuw mew samal kal dim bosiliw fut^k beem dim kuw bete te.^l

¹⁴⁻¹⁵^Ain so, ^balas so kaikabe kunum Aleksandel elo akal kilelbi bolewka! E nelo maka fian kenemeko, num kalan weng bokoyemkabuluw weng beelo dumin weng kitil nam kuw bokolewkabe kasike. Kate, Kamok Fian e em kukuw be diw atemeko, fein geelewoke te.^m

¹⁶Emisik ding e, i nelo geeyemkabe kunum em kiin mo konemsiliw beem ding e, mak kunum mak nelo dokoneminba kese te. Alik alik i nelo sak konemsiliw te. Sunbin-Got e mali biim wa kukuw kukunemsiliw be nam diwko, ateyemoke te! ¹⁷Kate Sunbin-Got e neso bomelei, kitil dunemse kasike, ne akalem Weng Kal Ken Ati be Suda kawtiw num ibik biliw kawtiw biilo atin kuw bokoyemii, ikati fein kilisiliw te.

^g 4:6 Filibai 2:17 ^h 4:7 1 Timoti 6:12 ⁱ 4:8 1 Kolin 9:24-25 ^j 4:10-11 Kalan Kunum 15:37-39; 2 Kolin 8:23; Kolosi 4:14 ^k 4:13 Mali kal kunum i ibolow fukuniwete: Samal kal dim bosiliw fut be Sunbin-Got em emisik kitakamin weng em fut anung ete te.

^l 4:13 Kalan Kunum 20:6 ^m 4:14 Sim Fut 62:12; Ulom 2:6; 1 Timoti 1:20

Kilisomeliwi, maka i ^alaion emdiw keko, nelo nenomin ibolow kesiliw kate, Sunbin-Got e nelo dokonemeko, im teing dim takalako, kulu konemse te. ¹⁸Feinka! Kamok Fian e nelo dokonemomi, nenomin wa kukuw alik alik beem deiw fein goto kelewsomi, akalem ^gawman dim abiil tikin beelo nemde unoke te.

Unesomi, akalem wiin diwkuw diwkuw fian katiw kel boke te! Feinka!

Fol em Fefe Kewkew Weng Bokoyemse em Weng te.

¹⁹Nakunum a! Kame, ku Bilisila so Akuila yemkal biso, Onesifolus em am biliw kunum waneng iso, alik biilo “Yukal o!”, yanga kai!”, yangolewka!ⁿ

²⁰Elastus e Kolin abiw mutuk fian kel kait be te.

Nem Miletus abiw mutuk fian kolew talsi ding kabalak e, Tolofimus e wakamin so kebelei, ne elo ka kel kolew telsi te.^o

²¹Ku fongate akate tolomin deiw fenko, tololewka! Nimtew angom? Mesik esik ku tiak ding fenew tewe, asolow so, inim fian so ding kelei, kom tolomin deiw okikemoke kasike.

Keko beli, Yubulus e, Fudens e, Ilinus e, Kolodia e, Kulais elo ibolow fein dangbiliw kunum waneng alik alik ikati kulo “Kukal o!”, kangiw te.

²²Kamok Fian e kom finik so amkobelei, boka! Sunbin-Got em ibolow folok e kuso boke te.

Bete kuw. Nem fut weng bokemi fut be kame kilaka.

ⁿ 4:19 Kalan Kunum 18:2; 2 Timoti 1:16-17 ° 4:20 Kalan Kunum 19:22; 20:4; Ulom 16:23